

Enrique Antón Chouciño Garrido, voceiro do grupo municipal do Bloque Nacionalista Galego presenta a seguinte MOCION, ao abeiro do Regulamento Orgánico Municipal,

### **Exposición de motivos**

Desde hai varios meses asistimos a un festival de propaganda municipal con notas de prensa case a diario sobre cuestións formuladas en futuro imperfecto, o goberno municipal fará, construírá, ampliará, modernizará...

Somos conscientes das necesidades de comunicación por parte das cuestións públicas de carácter municipal, mais isto non lexitima un exercicio de propaganda financiada con recursos públicos e sen o preceptivo control da corporación.

Descoñecemos por que o goberno municipal non utiliza o persoal de Radio Culleredo para ese labor, como un servizo público máis.

Desde o bng-aa temos solicitado información encol do axente de prensa que presta os seus servizos habitualmente nas dependencias do Concello, posto que non nos constaba que figurara na plantilla de traballadores municipais. Finalmente déronnos acceso ao contrato vixente, asinado en Xaneiro de 2018 por un ano. Non tivemos ocasión aínda de revisar os contratos polos que prestou os servizos anteriormente.

No contrato puidemos apreciar varias cuestións que nos fan dubidar da súa validez administrativa, e en consecuencia da súa eficacia, tal como:

1. Ausencia da revisión e informe da Secretaria municipal.
2. En consecuencia, ausencia de verificación do apoderamento da empresa ao asinante do contrato, da súa validez contractual, e do axuste á lexislación de contratación.
3. Ausencia de informe da intervención. Ao noso ver puidera estarse producindo unha acumulación de contratos, ilegal, e a falta de control da intervención non permite a correcto control dos fondos públicos.
4. Incumprimento contractual verificado. Despois de varios meses de vixencia do actual contrato, e de varios anos anteriores, o motivo deste

contrato, claramente non se está cumprindo. No exponendo primeiro, cita:

### **EXPOÑEN:**

1.- O concello de Culleredo propónse a contratación do servizo consistente na realización de traballos de Gabinete de Prensa e de actualización de contidos da páxina web municipal, de mantemento da conta do concello na rede social twitter, e dos paneis informativos exteriores, xa que o seu desenvolvemento require a disposición duns medios tanto humanos como técnicos dos que este concello non dispón nin, dada a súa especialidade, resulta convínte incrementalos.

Nos últimos anos temos preguntado porque non funcionan os paneis informativos exteriores. A día de hoxe seguen sen funcionar. Logo o motivo polo que se contratan os servizos desta empresa non se cumpren.

Por se fora pouco ese exponendo, máis adiante no contrato hai unha clausula que o reafirma:

### **CLÁUSULAS:**

PRIMEIRA.- D. ..., na representación que ostenta, comprométese a executar o contrato de realización de traballos de Gabinete de Prensa e de actualización de contidos da páxina web municipal, da conta de twitter e dos paneis informativos exteriores para o Concello de Culleredo,

5. Incumprimento da normativa laboral. Outro dos parágrafos do contrato, relata:

O desenvolvemento dos traballos descritos requirirá, polo tanto, dun labor presencial no Concello de Culleredo que, sen prexuízo das adaptacións que poidan requirir as circunstancias excepcionais de cada campaña, realizarse en horario repartido de mañá e tarde, isto á marxe do tempo de traballo non presencial

Esta clausula podería supor unha cestión de traballadores por parte da empresa, algo claramente ilícito segundo a normativa laboral. Lembremos que só o persoal con relación estatutaria ou laboral, pode exercer o seu traballo en dependencias municipais.

6. Incumprimento de garantía da información pública. Relativa ao acceso dunha persoa allea aos empregados públicos á documentación municipal:

CUARTA.- Acepta expresamente o sr ..., todas as condicións fixadas no presente contrato, e asemesmo comprométese a:

\*\*\*

5. Non difundir as informacións que lle fosen dadas confidencialmente, agás o permiso expreso da fonte.

6. Non empregar nunca en beneficio propio informacións privilexiadas, obtidas de xeito confidencial no exercicio da súa función informativa.

\*\*\*  
13. Toda a información facilitada pola administración ou a obtida polo adxudicatario en relación co presente contrato terá carácter confidencial, debendo o adxudicatario gardar o debido segredo profesional con carácter indefinido, salvo que a administración llo autorice expresamente e para supostos concretos e determinados.

Como pode ser que os representantes públicos elexidos polo pobo teñamos tantas restriccións para acceder aos documentos municipais, e algún alleo aos empregados e representantes públicos poida dispoñer dese tipo de información?

Polo exposto, rogamos que se admita a trámite e debate polo Pleno da Corporación e a adopción dos seguintes

#### **ACORDOS**

1. Que se incoe expediente de inicio para a revisión de oficio deste contrato e en caso de que proceda, declarar a nulidade de pleno dereito.



Culleredo 24 de Maio de 2018

Enrique Antón Chouciño Garrido